

30 Iunie

RUGACIUNEA 3

SOBORULUI SF. 12 APOSTOLI

Молитва

Владыко Господи, Твой есть день и Твоя есть ночь, Тебе вся тварь работает, и всякое дыхание славит Тя. Аз же, окаянный, все житие мое скончав блудно, страхом одержим есмь, яко помянух дни первыя, и до ныне, в няже вся нечувственная сотворих злая. И того ради не имам к Тебе дерзновения, яко беззакония моя велика, и безмерни греси мои, врази же всегда стужают ми. Но, Господи мой, Господи, отверзый устне немому, и моя уста отверзи, да глаголю в молитве угодная Тебе, се бо душа моя яко земля безводная оста, и не может приносить от себе плода. Но даждь ми от семене Святаго Твоего Духа, и напои мя росою благодати Твоея, да принесу Тебе плод покаяния. Господи Иисусе Христе, хотяй всем человеком спастися, услыши молитву мою, молитвами святых апостол Твоих, яко тии молятся за ны, и аз теми у Тебе прошу прощения, яко тех молитвы присно слушаеши; молением их спаси мя, грешнаго, исцели болезни сердца моего, уврачуй струпы души моя, разжжи утробы моя; пламень страха

Твоего да пояст терние грехов моих, и душу мою
любовию прохлади, к Тебе бо желаю истинному
Свету, и Подателю света, у Тебе Единого прошу
милости: спаси мя, насыти алчущую и напои
жаждущую душу мою, от потока безчисленного
милосердия Твоего, покрый мя благодатию
Твоего человеколюбия от всякаго зла, да Тобою
храним избавлюся многих сетей лукаваго, по вся
дни на мя пропинаемых, и да не похвалятся
врази мои о мне, рабе Твоем, уповающим на Тя,
и спаси мя по милости Твоей. Да воздам обеты
моя, до последняго издыхания каюсь о своих
согрешениях, и прославлю пресвятое имя Твое,
со Отцем и Святым Духом, ныне и присно и во
веки веков. Аминь.